



**KEMENTERIAN PERPADUAN NEGARA**

**TEKS UCAPAN PERASMIAN**

**YBHG. DATUK AZMAN BIN MOHD. YUSOF  
KETUA SETIAUSAHA,  
KEMENTERIAN PERPADUAN NEGARA**

**SEMPENA WALKABOUT**

**PROGRAM CITRA NUSA @ MUZIUM:  
MAGIS BELANTARA**

**10 OGOS 2024 (SABTU)  
8:00 MALAM**

**DATARAN MUZIUM NEGARA,  
JABATAN MUZIUM MALAYSIA**

Bismillahirrahmanirrahim.

Assalamualaikum Warahmatullahi Wabarakatuh,

Salam Sejahtera, Salam Perpaduan dan Salam Malaysia MADANI

*Terima kasih kepada Pengacara Majlis.*

## **SALUTASI**

***(\*akan disediakan secara berasingan)***

## **PENDAHULUAN**

1. Alhamdulillah setinggi-tinggi rasa kesyukuran kepada Allah SWT kerana dikurniakan keizinan untuk bersama-sama di dalam majlis pada malam ini.
2. Saya merakamkan setinggi-tinggi penghargaan dan ucapan terima kasih atas kesudian, Jabatan Muzium Malaysia menjemput saya untuk bersama-sama dalam Program Citra Nusa @ Muzium: Magis Belantara 2024 ini.

## **PROGRAM CITRA NUSA@MUZIUM: MAGIS BELANTARA 2024**

3. Program Citra Nusa@Muzium merupakan satu inisiatif di bawah *flagship* Kembara Perpaduan dan digerakkan oleh Jabatan Muzium Malaysia. Ianya telah dirangka khusus bagi mendukung usaha mempromosikan konsep MALAYSIA MADANI yang telah diilhamkan oleh Y.A.B Perdana Menteri, Datuk Seri Anwar Ibrahim.

4. Program Citra Nusa@Muzium: Magis Belantara 2024 ini adalah satu platform untuk memperkukuh wadah perpaduan dalam kalangan rakyat Malaysia melalui khazanah warisan negara.
5. Seperti yang kita sedia maklum, Malaysia adalah sebuah negara yang unik dengan keberagaman budaya dan berbilang bangsa serta kaya dengan warisan negara. Kesepaduan sosial (social cohesion) dan juga kesepakatan sosial (social bonding) ini bukanlah bersifat statik dan wujud secara sendiri. Ia mestilah dipupuk, diketengahkan dan dipertahankan dengan secara berterusan.
6. Saya melihat program seperti ini akan memberi satu nilai tambah kepada keberadaan muzium di arus perdana. Saya percaya program ini mampu mencapai objektif untuk menyubur dan menyemarakkan nilai-nilai perpaduan dan semangat patriotisme menerusi penghayatan terhadap warisan sejarah, budaya dan alam semulajadi negara.
7. Saya dimaklumkan pada malam ini seramai 200 peserta belia yang terdiri daripada pelbagai bangsa telah dibawa ke Muzium Negara untuk menyertai Program Muzium Uniti Trail termasuk menyertai program yang disusun melalui Magis Belantara.
8. Usaha Jabatan Muzium Malaysia melaksanakan aktiviti kemasyarakatan seperti ini akan memantapkan peningkatan apresiasi terhadap warisan sejarah, seni dan budaya negara serta meningkatkan Indeks Perpaduan Nasional sekaligus mengurangkan defisit sosial yang menjadi cabaran yang semakin mendominasi masyarakat Malaysia pada ketika ini.

## **MUZIUM KHAZANAH NEGARA**

9. Kerajaan menerusi Kementerian Perpaduan Negara akan sentiasa mengutamakan agenda untuk menjadikan muzium sebagai platform integrasi kaum, sesuai dengan fungsinya sebagai 'guardian of heritage' yang mengumpul, memelihara serta melestarikan koleksi warisan sejarah, seni dan budaya masyarakat berbilang kaum di negara ini.
  
10. Saya berasa amat berbangga kerana Jabatan Muzium Malaysia mengambil langkah proaktif menganjurkan pelbagai program serta aktiviti dalam membantu Kerajaan merencanakan lagi usaha mempromosikan konsep Malaysia MADANI. Kementerian sentiasa memberi sokongan terhadap usaha Jabatan Muzium Malaysia dalam mengangkat serta memartabatkan institusi permuziuman sebagai entiti yang memainkan peranan penting dalam pendidikan secara formal, tidak formal dan pembelajaran sepanjang hayat tentang warisan sejarah, budaya serta alam semula jadi Negara.

## **HARAPAN KEMENTERIAN PERPADUAN**

11. Bagi pihak kementerian, saya berharap program ini akan menjadi satu rangsangan kepada masyarakat setempat khususnya di Kuala Lumpur ini untuk terus menghayati erti sejarah dan ketamadunan seni masyarakat Orang Asli melalui aktiviti yang dianjurkan. Penglibatan komuniti artisan Orang Asli melalui program seperti ini diharapkan dapat menyerlahkan hasrat kerajaan meningkatkan semangat muhibah, toleransi dan sikap saling menghormati di antara satu sama lain.

## **PENUTUP**

12. Akhir kata, saya mengambil kesempatan ini untuk mengucapkan jutaan terima kasih yang tidak terhingga kepada semua yang terlibat sama ada secara langsung atau tidak langsung dalam menjayakan program ini, terutamanya kepada Masyarakat Orang Asli khususnya artisan Orang Asli, Agensi Kerajaan dan Swasta, juga tidak ketinggalan kepada para pegawai dan kakitangan Jabatan Muzium Malaysia serta Muzium Seni Kraf Orang Asli selaku penganjur kepada Program Magis Belantara ini.

Akhir kata, dengan lafaz Bismillahirrahmanirrahim, saya merasmikan **Program Citra Nusa @ Muzium: Magis Belantara 2024.**

Sekian, Terima Kasih.